



## Što ako propustim posljednji rok za moj dodatak na doživotno zdravstveno osiguranje?

Ako izvadite vaše bolničko osiguranje poslije isteka posljednjeg roka za vaš dodatak na doživotno zdravstveno osiguranje (Lifetime Health Cover), trebat ćete platiti LHC dodatak od 2% za svaku godinu za koju ste prešli 30 godina. Ako održavate bolničko osiguranje neprekidno 10 godina, LHC dodatak se ukida i više nećete trebati plaćati LHC dodatak na vaše bolničko osiguranje. Međutim, ako odlučite da prekinete svoje bolničko osiguranje i da ga kasnije ponovo izvadite, možda ćete trebati platiti LHC dodatak kad se ponovo učlanite.

Za pokriće manjih prekida, kao što je prijelaz iz jednog osiguranja u drugo, možete tokom svog života biti bez bolničkog osiguranja u ukupnom periodu od 1094 dana (tj. dan manje od 3 godine) bez da se to odražava na vaš LHC dodatak. Ako imate prekid od 1095 dana platit ćete dodatak od 2%. Za svakih 365 dana bez osiguranja poslije toga vaš LHC dodatak će se povećati za 2%. Ako predate molbu svom zdravstvenom osiguranju da na kratko vrijeme obustavi vaše bolničko osiguranje i ono se s tim složi, taj period obustave se neće odraziti na vaš LHC dodatak (smatra se da održavate svoje osiguranje).



## Ima li nekih drugih specijalnih okolnosti?

Ako ste australijski državljan ili ste stanovnik sa stalnim boravkom koji je odsutan u inostranstvu prilikom posljednjeg roka za dodatak za doživotno zdravstveno osiguranje (tj. 1. jula poslije vašeg 31. rođendana), nećete platiti LHC dodatak ako kupite bolničko osiguranje prije prve godišnjice dana kad ste se vratili u Australiju. Možete se vraćati u Australiju u periodima do 90 uzastopnih dana, a da se još uvijek smatra da ste u inostranstvu.

Vrijeme provedeno na otoku Norfolk Island je klasifikovano kao vrijeme provedeno u inostranstvu i to može da se odrazi na razne načine, zavisno od stvarnih datuma kad ste bili stanovnik Norfolk Islanda.

Ako ste član Australijskih obrambenih snaga - Australian Defence Forces – ADF, ADF vam pruža medicinske usluge, prema tome, smatra se da imate bolničko osiguranje. Ako ste otpušteni iz ADF poslije 1. jula nakon vašeg 31. rođendana, smatra se da koristite svoje dozvoljene dane bez bolničkog osiguranja (tj. 1094 dozvoljenih dana u vašem životu). Prema tome, možete izvaditi bolničko osiguranje i još uvijek plaćati samo osnovnu platnu stopu premije. Ako ste otpušteni iz ADF-a prije 1. jula poslije vašeg 31. rođendana, tada se primjenjuju normalni propisi.

Ako ste nosilac zlatne kartice Odjeljenja za boračka pitanja – Department of Veteran Affairs (DVA) Gold Card – smatra se da imate bolničko osiguranje. Ako ste nosilac zlatne kartice u bilo koje vrijeme poslije 1. jula 1999. i DVA je kasnije povukao karticu, možete postaviti zahtjev za period dok ste imali karticu, kao period sa bolničkim osiguranjem.

Ako ste rođeni 1. jula 1934. ili ranije, izuzeti ste od LHC dodatka. Možete izvaditi ubuduće u bilo koje vrijeme bolničko osiguranje i plaćati samo osnovnu platnu stopu premije.



## Gdje mogu saznati nešto više o doživotnom zdravstvenom osiguranju?

Postoje državne Internet stranice koje pružaju informacije o privatnom zdravstvenom osiguranju i o doživotnom zdravstvenom osiguranju – Lifetime Health Cover. Adresa tih Internet stranica je [www.PrivateHealth.gov.au](http://www.PrivateHealth.gov.au). Alternativno, možete nazvati besplatan broj Odjeljenja za zdravlje i starenje na 1800 020 103.



## Šta treba da znate o doživotnom zdravstvenom osiguranju



## Šta je doživotno zdravstveno osiguranje?

Doživotno zdravstveno osiguranje – Lifetime Health Cover – sadrži finansijski dodatak (LHC loading) povrh vašeg privatnog zdravstvenog osiguranja za bolničko liječenje (hospital cover). Predviđeno je za podsticanje ljudi da izvade bolničko osiguranje ranije u životu i da održavaju to osiguranje. Ako izvadite bolničko osiguranje ranije u životu i ako ga održavate, plaćat ćete niže premije u usporedbi sa nekim tko vadi takvo osiguranje kad je stariji.

Ako ne želite plaćati LHC dodatak treba da uplatite bolničko osiguranje prije posljednjeg roka za uplatu LHC-a. Vaš posljednji rok je 1. jula poslije vaše navršene 31. godine; ili, za nove doseljenike, 12 mjeseci od kad ste se registrovali za Medicare.

LHC dodaci se odnose samo na bolničko osiguranje. Ne odnose se na privatno zdravstveno osiguranje za pokriće opšteg liječenja (također poznatog kao pomoćno osiguranje – ancillary cover ili dodaci – extras).

## Navršavate 31 godinu?

Ako izvadite bolničko osiguranje prije 1. jula nakon vašeg 31. rođendana, izbjeci ćete plaćanje LHC dodatka povrh vašeg bolničkog osiguranja.

Ako izvadite bolničko osiguranje poslije tog datuma, platit ćete LHC dodatak od 2% za svaku godinu za koju ste prešli 30 godina. Npr. ako izvadite bolničko osiguranje u starosti od 40 godina, plaćat ćete dodatnih 20% povrh troškova vašeg bolničkog osiguranja. Ako čekate dok navršite 50 godina, plaćat ćete 40% više. Itd. do maksimuma od 70% više.

## Primjeri:

- » Naomi navršava 31 godinu 1. marta 2008. Vadi policu bolničkog osiguranja za samce 21. aprila 2008. (prije 1. jula iza svog 31. rođendana). Trošak njene odabrane police bolničkog osiguranja je \$1,000 godišnje. Da je čekala do augusta 2008. (poslije 1. jula nakon svog 31. rođendana) trebala bi plaćati dodatnih 2% povrh cijene troška njene police (\$1,020 godišnje). Da je Naomi čekala do oktobra 2013. kada bi imala 36 godina, da izvadi istu policu osiguranja za pokriće bolničkih troškova, trebala bi plaćati LHC dodatak od 12%. To bi iznosilo dodatnih \$120. LHC dodatak će se primjenjivati za 10 godina neprekidnog bolničkog osiguranja, prema tome, tokom tog perioda platila bi dodatnih \$1,200.
- » Matt ima 55 godina. Ima policu privatnog zdravstvenog osiguranja za opće pokriće čime mu se pomaže da plaća za svoje naočare i zubarsko liječenje, ali nema bolničko osiguranje. Ako sada odluči da izvadi bolničko osiguranje trebat će platiti LHC dodatak od 50%. To znači, ako izvadi isto bolničko osiguranje za samce kao Naomi, koštati će ga \$1,500 godišnje, umjesto \$1,000. Tokom 10 godina prilikom kojih se primjenjuje LHC dodatak, platit će dodatnih \$5,000.

## Novi doseljenici

Ako ste novi doseljenik u Australiju i stariji ste od posljednjeg roka za LHC (1. jula poslije vaše navršene 31. godine) primjenjuju se specijalni uslovi.

Kao novi doseljenik u Australiju ne trebate plaćati LHC dodatak ako izvadite bolničko osiguranje u roku od 12 mjeseci od kad ste se registrovali za Medicare. Poslije tog vremena, kad vadite bolničko osiguranje, treba da platite LHC dodatak od 2% više za svaku godinu preko 30 godina starosti.

Kao doseljenik, dobra je ideja da razmislite o vađenju bolničkog osiguranja u prvoj godini nakon vaše registracije za Medicare. Ako čekate i vadite bolničko osiguranje poslije tog datuma, platit ćete više za svoje bolničko osiguranje, pošto će u cijenu biti uključen i LHC dodatak. Prema tome, što ste stariji, koštati će vas više.



## Primjeri:

- » Hanh ima 35 godina, imigrirala je u Australiju 1. marta 2008. Ima vizu za stalni boravak, prema tome ima pravo na Medicare. Predaje molbu za karticu Medicare 1. aprila 2008. Ako izvadi bolničko osiguranje prije 1. aprila 2009. ne plaća LHC dodatak. Ako Hanh odloži kupovinu bolničkog osiguranja do poslije 1. aprila 2009. (godinu dana nakon što je predala molbu za karticu Medicare) primjenjuje se LHC dodatak zasnovan na njenoj starosti (2% za svaku godinu za koju je prešla 30 godina u vrijeme kada vadi bolničko osiguranje). Važan datum je datum kada Medicare Australia prihvati njenu molbu za karticu Medicare. Hanhin vizni status nije važan.
- » Javier ima 35 godina i imigrira u Australiju 1. marta 2008. Ima vizu za privremeni boravak i nema pravo na Medicare. 1. maja 2010. prihvaćena je njegova molba za stalni boravak i stiče pravo na Medicare. Javier preda molbu za karticu Medicare 1. juna 2010. Ako izvadi bolničko osiguranje prije 1. juna 2011. neće se primijeniti LHC dodatak. Ako Javier to odloži do poslije 1. juna 2011. primjenjuje se LHC dodatak zasnovan na njegovoj starosti. Važan datum je datum kada Medicare Australia prihvati njegovu molbu za karticu Medicare. Javierov vizni status nije važan.
- » Ilango ima 25 godina i imigrira u Australiju. LHC dodatak se ne primjenjuje na osobe do 1. jula poslije njihovog 31. rođendana. Ilango ima nekoliko godina do 1. jula poslije svog 31. rođendana da izvadi bolničko osiguranje bez da plati LHC dodatak.

